

甯武府志

T 3149/3214

CHINESE - JAPANESE LIBRARY OF
HARVARD - YENCHING INSTITUTE

5

AT HARVARD UNIVERSITY

JUN 25 1936

Gift of
East Asiatic Society

寧武府志卷之十

事考

周成王時樓煩入朝與成周之會

戰國趙肅侯築長城盡趙北界

趙武靈王出代西遇樓煩王而致其兵

趙武靈王十六年破樓煩林胡取其地置儋林郡

漢高祖五年韓王信叛降匈奴與寇漢邊至太原七

年絳侯周勃擊韓王信於礮石破之追北八十里

還攻樓煩三城十年秋九月信與陳豨合兵寇代



雁門勃復敗之於樓煩定雁門十七縣

漢武帝元光五年正月發卒萬人治雁門險阻以止

匈奴之驩

漢景帝中六年夏六月匈奴入雁門至武泉吏卒戰

死者二千八後二年三月匈奴入雁門太守馮敬

死之

世祖建武九年驃騎將軍杜茂與雁門太守郭涼擊

盧芳將於繁峙芳將賈賢率胡騎萬餘救之茂等

戰不利引兵入樓煩城

安帝延光元年十月鮮卑寇雁門

後漢自順桓靈獻之世邊郡爲鮮卑所鈔無有寧歲

順帝永和五年已徙西河治離石上郡治夏陽朔

方治五原至獻帝建安二十年春乃省雲中定襄

五原朔方四郡郡唯置一縣領其民以爲新興郡

考新興郡在今忻代二州間蓋遷四郡之民入

居於此而各卽其郡爲縣以領之此州郡僑置

之最始者至曹丕時則又并雁門代郡之民亦

徙之於內以避鮮卑

魏明帝青龍元年鮮卑軻比能誘保塞大人步度根使叛并州自將萬騎迎之於陜北遣其子率兵與并州刺史畢軌將蘇尚董弼會戰樓煩尚等敗死晉懷帝永嘉六年代拓跋猗盧取陜北地初并州刺史劉琨與猗盧相結托爲外援表爲代公猗盧乃從琨求勾注陜北之地琨不能制乃徙馬邑陰館樓煩繁峙崞五縣之民於陜南更立城邑以其地予之

北魏高宗和平六年春二月行幸樓煩宮

顯祖皇興元年八月幸武州山

高祖延興元年五月幸武州山

太和元年四月幸崞山乙酉車駕祈雨於武州山澍雨大澆四年五月幸火山六年三月幸武州山賜貧老者衣服七年四月幸崞山賜饑寡粟帛八年幸旋鴻池遂幸崞山六月武州水壞民廬舍

魏志疑武州山卽蘆芽山而所稱幸彌澤者疑卽彌蓮池恐未然

東魏天平二年以蘭陵公主許蠕蠕阿那瓌三年四

月阿那瓌遣使迎公主於新城之南六月齊神武親送公主於樓煩之北厚接其使阿那瓌大喜自此東魏邊境無事神武至天池獲瑞石隱起成文曰大王三川

北齊文宣帝五年九月如晉陽十二月北巡至達達嶺親覽山川險要將起長城

六年夏六月文宣親討蠕蠕甲戌諸軍大會于祁連池乙亥出塞九年六月自晉陽北巡己巳至祁連池

北齊後主緯七年十月大狩於祁連池

隋煬帝大業三年四月北巡過雁門幸啓民可汗帳八月癸巳入樓煩關十一年五月幸太原避暑汾陽宮八月巡北塞突厥以十萬騎來襲帝馳幸雁門突厥攻雁門急帝求救義成公主乃解去

恭帝義寧元年馬邑校尉劉武周殺太守王仁恭襲破樓煩進據汾陽宮取宮人以賂突厥僭號天與唐高祖武德四年突厥與苑君璋合兵寇雁門七年詔并州總管劉世讓屯兵雁門以禦突厥世讓

馳赴之突厥大至世讓乃保代州突厥與高道蘭等合攻之城樓壞輒立柵完據久之乃引去

高宗永淳元年突厥骨咄祿反攻并州嵐州刺史室德茂死之

儀鳳中置監牧使於嵐州統樓煩天池元池之監以蕃馬牧百官志有樓煩天馬監

明皇天寶十三載安祿山以內外閑廐都使兼領樓煩監牧時祿山將反乃陰取勝甲善馬盡歸於范陽

僖宗乾符五年沙陀李國昌與其子克用叛攻破嵐嵐軍後爲唐所敗國昌父子奔韃靼克用以韃靼萬人僂至太原襲蔚州去屯雁門擾樓煩并汾間城門晝閉不釋鎧甲

魏志載沙陀寇雲朔二州全錄史文不勝煩沓又元和乃憲宗年號武宗紀元則會昌耳亦未考也

五代北漢劉鈞元年城偏頭砦

北漢劉鈞十一年肥遺見於唐故天池縣地

周世宗顯德元年取北漢嵐憲二州

宋太宗太平興國四年二月保安軍使尹憲與折御卿合攻北漢嵐州克之殺其憲州刺史霍翊擒北漢將馬延忠等七人拔沿河諸砦入朔州界破契丹寧武軍

五年置寧化軍寧化縣七年置火山軍號曰壯城鎮偏頭雄勇董家橫谷桔櫟護水六砦

雍熙三年十二月知代州張齊賢大敗契丹於土磴砦

真宗景德元年九月契丹圍岢嵐軍高繼祖擊敗之仁宗嘉祐六年廢偏頭砦

慶 七年契丹冒占天池廟地知并州韓琦召其酋示以舊修廟檄証爲宋地酋無以對乃以斥地歸我又侵耕陽武砦琦立石限之初潘美鎮河東徙塞下之民於內而空其地不耕忻代寧化火山之北多廢壤琦請距北界十里爲禁地其南則募弓箭手居之墾田至九千六百頃

神宗熙寧七年火山軍禾間五壟同類

是年契丹使蕭禧來議黃嵬山疆地帝使沈括報之
括至契丹與其相楊益戒議凡六會契丹不能奪
乃捨黃嵬而以天池請十年丁巳王安石當國勸
帝許之乃遣韓縝如河東割地以界契丹以分水
嶺爲界東西失地七百里

魏志以今郡西四十里之分水嶺爲宋遼所界
者然觀宋史初遣劉忱往至境與遼使蕭禧會
於大黃平議數日不決契丹本指應蔚朔三州
之分水嶺土隴爲界及行視無土隴禧曰但以
分水嶺爲界則凡山皆有分水無可指據是遼
宋所劃者未必果此分水嶺也不然史安得云
東西失地七百里哉但遼旣以天池請則今寧
化之北亦在其中矣黃嵬在崞南七十里近寧
化界

建中靖國元年寧化軍地震彌旬晝夜不止壞城舍
人畜多死

徽宗宣和五年夏與金代遼金以武蔚朔三州歸宋
欽宗靖康元年三月夏人襲取武州後金復取之

靖康二年金人取火山軍

遼乾亨元年十月太保矧思與宋兵戰於火山敗之

遼統和九年八月大獵於盤道嶺

開泰九年大獵於陁山

重熙九年置武州

金天會五年五月取宋岢嵐寧化諸軍

大定二十二年升寧化軍為寧化州

興定三年十月詔河東折代寧化諸州並受岢嵐隴

府節制

二年元兵克武州軍事判官郭秀死之

貞祐三年二月改寧邊州隸嵐州十二月徙武州

分屯嵐石等州時武州殘毀刺史楊沃入州甫二

月元兵來攻二十七日夜不能拔乃退既而金人

知武州不可守乃令沃遷其軍民於岢嵐

元太祖十二年蕭特末兒等攻降金岢嵐火山軍

十六年以寧化樓煩併入管州

至元二年於武州置司侯司

世祖中統四年四月十七日武州隕霜殺稼

成宗大德五年二月興屯田於寧武與山陰雁門馬
邑等凡七屯

英宗至治元年武州雨雹害稼四年武州雹害稼
文宗天歷元年治險阻自雁門崞及嵐武大澗諸處
皆穿塹壘石以爲阨塞調丁壯守之

順帝至正三年罷寧化州改爲寧化巡檢司

二十年李羅帖木兒察罕帖木兒爭冀寧相攻不已
明年正月諭罷兵李羅跋扈不從且多據州縣二
十四年七月右丞魏賽因不花討李羅五月克武
州七月魏賽因不花移鎮偏頭關一方安堵

明太祖洪武二年都叔汪興祖等取武朔二州禽元
知院馬廣等六百三十四人

三年五月元宗室四大王結砦崑嵐山中來寇武州
太原指揮程貴等敗之追至龍尾灣四大王遁禽
其三大王獻京師

五年增築寧化城延安侯唐宗勝帥千戶唐成等勦
四大王餘部平之

六年元故將以兵犯武州朔州大將軍徐達使郭子

興等禦却之

七年設鎮西衛於崑嵐屬山西都司置五寨堡省武州併入之以爲鎮西五所屯牧之地

十一年正月立寧化所守禦千戶都指揮常守道來屯寧化

二十三年改築偏頭關置守備專勅守關

宣德四年都督李謙來屯置偏頭關總兵官

魏志云成祖永樂二年都督杜忠來屯考忠於

正統丁卯始以後軍都督守偏關而忠之前則

唯李謙在宣德中其守偏關有拓城建堡之功

若永樂時絕無見於他書者此通志之失而魏

乃仍之魏志又云宣德四年置鎮守總兵官於

偏關提督雁門寧武三關軍務是時寧武尚未

設關何有三關之名其所記亦誤

七年兀良哈由段家村入犯偏頭總兵李謙設伏黃

草梁禽其酋長

十年兀良哈寇偏關指揮江海千戶包讓等戰死

正統元年北虜復入寇偏關指揮馬貴等敗其前鋒

將軍陳懋又大敗之追至蘇武山而還
四年偏關大饑詔墾塞下荒田以實軍儲
十四年也先寇偏關其別部由陽方口入寇南掠忻
州諸處

景泰元年七月也先犯偏頭至五寨堡

天順元年崞縣大饑

成化元年初置兵兩道以葉盛爲兵備副使駐鴈門

偏關

勅諭山西整飭鴈門等關兵備副使代州偏頭
雁門寧武等處界乎大同延綏兩間與豐州東
勝等處接壤北賊夏秋以爲巢穴牧住冬春於
此過河入套實爲賊衆經行繫要之地今特命
爾常川往來前項地方整飭兵備操練軍馬修
理城池墩臺隘口監督糧草兼理軍民詞訟禁
革姦弊凡事須與各該鎮守巡撫分守守備等
官公同計議從長處置毋得偏私執拘致誤事
機所屬地方官員敢有違誤不法等項輕則量
情懲治重則應拏問者據實奏聞爾爲憲臣尤

須持廉秉公正已率下務使兵威振舉地方有
賴庶副委任如違責有所歸爾其慎之慎之故
論

明初設雁門道寧武偏關實所兼統後二道分
置此爲之權輿故不以入職官而事考特載之
二年初設寧武關築偏頭長城起老營丫角墩至老
牛灣二百四十里號爲二邊總兵王璽經紀之
十五年火節部由紅門口入寇小王子大掠偏關
十八年罷偏關總兵置分守叅將是年小王子寇
頭守備錢能禦之失利

十九年小王子寇偏關破楊勉堡

治元年火節部入楊勉堡

十一年都御史侯恂請置寧武守禦千戶所掌印巡
捕理刑城操等各一員隸山西都司

三關志云寧武初設關則但置所未與偏頭同
十四年小王子寇偏頭關十五年復入是年罷叅將
置協守偏關副總兵行事視鎮守總兵官

正德七年小王子入犯破黃龍堡寇偏頭總兵神周

戰敗於柞子塢守備周鏞及指揮千百戶官戰沒者數人

八年築長城東起渾源州西至寧武因山爲險凡四百餘里明年復築長城起老營之石廟至石梯墩七十里號爲三邊布政陸奎兵備張鳳狷等主之凡三關增堡十八增墩三十有二增料甲士民兵至二萬人是年八月小王子由陽方口入寧武關守備陳經力戰死之遂掠忻州定襄寧化

八年六月偏頭寧武八角兩魚大者至三尺許九年小王子由驢皮窰入犯偏頭又犯黃龍池大掠至河曲縣

十年築偏關四牆於城北二里起鷹窩山至教場一百二十里兵備張狷主之

十一年小王子由紅門口入寇偏頭總兵郭瑾敗之山莊坪斬三百級

十三年九月帝西幸由大同歷老營堡至偏頭關駐蹕鎮守太監宅凡十一日渡幸榆林

十六年副總兵紀世楹逐套部之入犯利民堡者戰

於塞外大勝而返

嘉靖元年偏關大旱八月不雨地乾丈餘五穀不能種餓死盈野

嘉靖七年七月北敵大舉由乾溝等口分道入寇至馬站堡老營游擊邵定往禦之於草梁山被困四日水絕食盡定一軍盡歿

八年十月俺答入寇至土棚堡副總兵李瑾與戰於劉海庄不利乃與游兵合營而進俺答遁走

九年正月俺答由衝川入寇老營柘揚八柳二堡總兵李瑾先設伏兵龍灣縱擊大破之斬數十級獲良馬百餘自是俺答畏瑾終其任不敢犯

魏志九年正月寇老營乃於其前又云九年正月由陽方口入寇寧武同一事而所入之路與所寇之地互異何哉考之寇老營者實而足信云入陽方口者殆虛語耳蓋失在凡事必欲分列四縣而各記於其下至不可相通者亦必附焉故往往多複雜矣

十一年三關大饑死者相枕十月賑之

十二年都御史任洛請自鵬窩梁王達達墩築邊八里二百二十步砌以石

十四年俺答犯寧武南掠寧化三馬營十月復入二馬三馬兩營寧化堡再被掠

十五年八月俺答分道自馬頭山紅門二口入合兵南掠寧武及寺瑪馬站諸堡十月復自崧頭溝丫角山入鎮西寧化之間民被其害時李瑾已死副總兵傅鐸率守備楊璫等力戰乃退

十六年北部分道由滑石澗草梁山毀牆入又由平鹵衛西至老營破賈家馬站韓坪樓溝諸堡南掠至三岔五寨鎮西衛城門晝閉村落幾空

十七年由衝川口入犯八柳樹明年復犯八柳樹十八年巡撫陳講築長城起陽方口至八角堡斬崖爲墻凡一百八十里復築神池利民二城是年套部入五寨駐兵肆掠明年入寇仍駐其地

十九年八月俺答與諸部入大同塞大同鎮卒陰與約毋掠我人畜我不闌汝諸部喜乃越大同由井坪朔州南抵雁門西至寧武燒盤道梁南下入岢

寧武府志 卷之十一
嵐鎮西掠興嵐交城文水清源諸縣是月其別部
犯黃龍池千戶雷應節死之

二十年俺答由王野梁入掠鵬窩梁時副總兵丁璋
已有疾乘輿督戰與游擊周宇皆死焉俺答遂南
掠逼太原先是秋八月吉囊由紅門入偏頭掠永
興韓坪馬站樓溝攻三岔南下至右州岢嵐歸未
出塞而俺答復入則九月事也

是年改偏關副總兵爲總兵官移駐寧武以控要害

二十一年設岢嵐兵備道防秋駐偏頭關總督余子
俊築長城起大同中路至偏頭關界凡六百里是
年六月俺答入大同經朔代雁門越盤道梁南掠
太原七月還至塞掠黃龍池寇偏關叅將張守忠
力戰死之百戶張臣張宣亦死詔贈守忠右都督
立廟以祀

二十三年都御史曾銑增築邊牆北自利民南至王
野梁一百八十里

二十七年俺答寇偏關明年由朔州入至王野梁遂
南下深入

寧武府志 卷之十
三十年套部由紅門入掠寺塢承興三岔諸堡至石
州

三十一年岢嵐神池地震俺答犯三關縱掠至八角
堡巡撫趙時春禦之戰於大虫嶺總兵李涑死焉
明年入犯得勝堡至神池

三十三年九月套部入掠五寨攻毀后子窰東西二
寨大小燕家庄韓林庄輻車梁諸村落皆被焚掠
安堂堡生員馬仲甫家被害一門無遺明年由菽
麥川入掠利民南至興嵐

三十八年小王子等由紅門入掠韓坪馬站寺塢三
岔五寨攻大辛庄左所雙碾兒寺兒塢羊房紫寨
等村堡破之

三十九年偏關大饑市無米穀木皮皆盡俺答寇大
同遂至寧武火燒盤道梁由羊川坡踰夾柳樹狗
兒澗長驅圍寧武關總兵王懷邦不敢戰棄馬千
匹以啖寇而急趨太原聲音繞其前實避之也俺
答遂掠攻神池十月犯偏頭把總張士英力戰而
死

是年設兵備道於鎮城及中路管糧通判本道中軍
管糧同知萬億倉大使副使各一 是爲寧武道
四十一年正月寇由水泉口入掠諸堡攻三岔五寨
毀賀智杏林小河頭後會諸村生員李孔煌一門
四十五人皆被殺唯孔煌在城得免
四十三年由水泉口犯偏關大掠八角神池五寨至
尙嵐明年秋俺答由了角山至老營別部由紅門
入殺掠甚衆及於保德

隆慶元年俺答數萬衆分三道入東道入井坪朔州
破陽方口抵寧武關中道由老營入西道由紅門
驢皮等口入長驅掠五寨攻尙嵐屠石州時虜入
塞已二十餘日大雨連旬虜馬多死皆走歸棄剽
獲於道官軍無一邀擊者寧武總兵申維岳大同
總兵孫吳等覘俺答旣去始約進兵然維岳終不
敢戰事聞維岳論死

三年八月俺答入寇時中國叛人趙全爲虜鄉導引
之自好漢山入栢楊嶺以攻老營總兵郭琥偵知
之自寧武一晝夜馳二百里先至設伏以待於是

寧武府志 卷之十
俺答敗歸十二月復由東長嘴乘冰過河犯偏頭
把總張尚古紀大倉等死之明年十月由刁窩嘴
乘冰過渡河掠偏頭及樓子河曲諸營

萬 十三年寧縣大饑

十八年寧縣大饑

二十九年山西諸衛旱七月隕霜殺禾靜樂神池皆
大饑詔免秋稅

三十五年大修盤道梁

四十六年偏關神池地同日大震

崇 二年春寧武營兵趙虎喇等與河曲土寇及三

關大盜王剛潛相通將爲亂官捕虎喇誅之然其
黨在兵籍者甚衆五年七月有史祿者首以索餉
爲名激衆使變大譟於南關且肆殺掠兵徒多從
之列隊教場揚言赴代州起事而陰令黨輩四出
糾賊勢洶洶幾不測副總兵邵勲與兵備道合謀
擒祿斬之於轅門其徒置法者數人事乃定先是
虎喇方欲亂時城北關壯繆廟刀忽鳴至祿之變
刀又有聲人以爲神兆

寧武府志 卷之十
崇 十四年大饑斗米銀八錢死者山積人相食偏
關民王元士施地埋殍掘坎深廣三丈數日而滿
十七年二月李自成攻寧武總兵周遇吉死之城
中 爲賊所戕殺者數千人

國朝順治六年寧武兵聞大同總兵姜瓖反羣起從
賊時文武官吏死者副總兵李吉兵道金元祥通
判張國賢把總丘登於是寧武兵闖營攻崞縣大
陽堡殺生員張琳李含玉及其父貢生李且時大
恣焚劫明年大軍討平之時偏關人亦應賊副使
徐淳叅將張國纓等皆死於兵及亂定淳等各贈
官

八年大饑偏關民婦范氏誘殺人而食之

康熙三年六月偏關河水暴溢壞民舍多溺死者城
內水深丈餘

十九年偏關太饑民掘白泥而咽之
二十九年寧武大饑人多餓死

雍正元年六月偏關大水西城門內水深二丈斗米
三百錢

三年置府縣改設文武員

乾隆十二年正月一日五色雲見於寧武

寧武府志卷十一

餘錄

十六國春秋劉曜初隱管涔山閒居夜有二童子入
跪曰管涔王使小臣奉謁趙皇帝獻劔一置前再拜
而去以燭視之劔長三尺光澤非常赤玉爲室背土
有銘曰神劔御除衆毒曜遂服之劔隨四時而變爲
五色

大業拾遺記二年七月勅於汾陽西北四十里臨汾
水起汾陽宮卽管涔山河源所出之處也當盛夏月

臨河盥漱卽涼風凜然如八九月十年四月幸汾陽
宮避暑宮城迺隘百官士卒布散山谷上有名山管
涔高可千仞上千青霄造亭子十二所其最上名翠
微亭次閼風彩霞臨月飛芳積翠合璧含輝凝碧紫
巖澄景最下名尚陽亭亭內皆縱廣二丈四邊安劔
欄每亭繡方尺榻子一合上下皆有臨汾殿敕從官
縱觀史稱四年起汾陽宮拾遺以爲二年史稱十一
年避暑拾遺以爲十年唐書高祖武德元年七月庚
申廢隋離宮

唐劉武周瀛州景城人父匡徒馬邑武周驍悍善騎
射募征遼有功還馬邑爲鷹揚府校尉太守王仁恭
愛之置麾下見天下已亂陰有異計與其黨張萬歲
等斬仁恭開倉賑窮乏得兵萬餘自稱太守附突厥
雁門丞陳孝意虎賁郎將王智辨合兵圍其桑乾鎮
突厥與武周共擊智辨破之孝意奔還雁門雁門人
殺之以城歸武周武周因襲破樓煩據汾陽宮聚宮
人以賂突厥突厥以狼頭纛立武周爲定揚可汗
宋史張齊賢傳雍熙三年代州揚業戰沒上訪近臣

以策齊賢請行卽授給事中知代州與部都署潘美同領緣邊兵馬是時遼兵自湖谷入寇薄城下神衛都校馬正以所部列南門下衆寡不敵副部署盧漢贊畏懦保壁自固齊賢選相軍二千出正之右誓衆慷慨一以當百遼兵遂却先是約潘美以并師來會戰無何間使爲遼人所得齊賢以師期旣漏且虞美衆爲遼所乘旣而美使至云師出并州至北井得密詔東師敗績于君子館并之全軍不許出戰已還州矣於時遼兵塞川齊賢曰賊知美之來而不知其遠

乃閉其使密塞中夜發兵二百人持一幟負一束帛距州城西南三千里列幟然芻遼兵遠見火光中有旗幟意謂并師至矣駭而北走齊賢先伏步兵二千於土墜砦掩擊大敗之擒其北大王之子一人帳前舍利一人斬數百級獲馬二千器甲甚衆張齊賢傳云自河東初下臣知忻州捕得契丹納米典吏皆云自山後轉般以授河東以臣料契丹能自備軍食則於太原非不盡力然終爲我有者力不足也河東初平人心未固嵐憲忻代未有軍砦入寇則

田牧頓失擾邊則守備可虞及國家守要害增壁壘左控右扼疆事甚嚴恩信已行民心已定乃於雁門陽武峪來爭小利此其智力可料而知也雍熙三年大舉北伐卽以齊賢知代州與部署潘美同領緣邊兵馬

真宗景德二年河東都轉運使歐陽修言代州崑嵐寧化火山軍被邊地兇二萬頃請募兵種充弓箭手墾之宜撫使范仲淹以爲便遂以崑嵐軍北草城川禁地募人距敵界十里外占耕得二千餘戶歲輸租數萬斛自備弓馬涅手背爲弓箭手并州明鎬沮議而止

明武宗正德十三年秋八月乙酉如大同九月庚子次偏頭關癸丑勅曰總督軍務威武大將軍朱壽親統六師肅清邊境特加封鎮國公歲支祿米五千石吏部如勅奉行冬十月戊辰渡河己卯次榆林

紀事本末云十三年九月幸大同時乘一馬侍從鹵簿皆不及由郡境歷老營堡至偏頭關輕騎戎衣顧關而笑曰此是偏頭關耶是月二十四日爲帝萬歲

節從臣皆賀明日雨雪駐驛十月初四日幸樓子營已漏下一刻旌旂夾道燈火燭空山川震動明晨從娘娘灘太子灘抵灰溝營始進午膳因幸唐家會祭河神詔善沒者觀之民李應祥應詔連浮二次上喜賜酒遂登舟擊楫中流抵西岸幸榆林以西北風惡回駕時秦晉兩藩咸集車騎雲屯聲震山谷

明穆宗隆慶四年總督尚書王崇古始上疏請予俺答封貢條八事以請疏下廷議帝終從崇古言五年春三月己丑詔封俺答爲順義王賜紅蟒衣一襲

都力哈黃台吉等以下各受都督指揮千百戶等賞有差遂詔山西開馬市於水泉營紅門口邊外秋市成凡得馬五百餘匹賜俺答等綵幣有差俺答老倭佛常遠處青山二子曰賓兔居松山直蘭州之北曰丙兔居西海直河州之西益求互市多桀驁俺答諭之亦漸馴自是約束諸部無入犯歲來貢市西塞以寧

水泉營市場奇嵐道所隸有宴敵所互市於此設宴邊外有闌三日中左右馬從三闌入市場臨邊有闌

一曰內關馬從此登數入境紅門有臺周長一十三丈臺上有納款廳敵來于此撫賞節年議准以客兵貯積銀一萬兩爲宴饋之費銀恐不足補給馬價銀一萬兩撫賞窮夷馬每年以六千爲率價每匹以十二兩爲率互市之日岢嵐道提調雁門寧武兩道協理之總兵副將統兵彈壓其境西路叅將聽理市事分正兵營軍馬二千一駐老營一駐八柳樹馬站遊兵營軍移駐滑石澗小營兒獅子坪叅將軍移駐馬站堡以備各路要衝仍行各城軍官操防慎固兼饋征調互市畢軍門會題給賞有差

羅點聞見錄汾陽有天池在燕京山上周迴八里後魏孝文帝以金珠穿魚七頭於池放之後於桑乾源得七魚猶爲不信又以金縷拖羊箭射着此大魚久之又於桑乾河得所射箭山在嵐州靜樂縣東北百四十里俗名天池曰祁連池土人名天池躍鱗池西有老馬溝隋開皇間建祠池上所禱多應

齊顯祖文皇帝高洋天保六年六月如晉陽親討茹茹甲戌諸軍大會於祁連池乙亥出塞七月壬午及

於懷朔鎮大破之九年六月乙丑自晉陽北巡己巳
至祁連池戊寅還晉陽後主高緯武平七年七月丁
丑幸晉陽十月丙辰大狩於祁連池天保末顏之推
從至天池以爲中書舍人令中書郎段孝信將敕書
出示之之推方於營外飲酒孝信還以狀言顯祖乃
曰且停由是遂寢

唐置天池監楊光遠在代北嘗以紙錢祭天池投之
輒沒

朱慶歷中遼求天池廟地河東帥龐籍不能決以
汾州都監郭達達訪得太平興國中故牘證爲王士
檄報之遼人愧服

兩鎮三關志陳家谷狼牙村俱在今朔州南托羅臺
在寧武關東橐蓮臺亦作托蓮臺今陽方口河西高
山謂之橐蓮臺朔州志稱爲王侁望楊業軍處崞縣
志但志臺名不言王侁望軍事宋史楊業傳爲代州
刺史會契丹入雁門業領兵自西陁出由小陁至雁
門北口南向背擊之契丹大敗雍熙三年楊業副潘
美連接雲應寰朔四州會曹彬等不利詔諸路班師

美等歸代州未幾詔遷四州之民內地令美等部兵護之時契丹衆十餘萬復陷寰州業謂潘美等曰朝廷止令取四州之民但令兵出大石路先遣告雲朔守將俟軍離代州日令雲州之衆先出我師次應州契丹必來拒卽令朔州民出城直入碣石谷遣強弩千人列於谷口以騎士援於中路則三州之衆保萬全矣王侁不可令但趨雁門北川口鼓行而往業不得已將行因指陳家谷口曰諸君於此張步兵強弩爲左右翼以援俟業轉戰至此卽以步兵夾擊救之美卽與侁陣於谷口自寅至己侁使人登托羅臺望之不見一人以爲契丹敗走欲爭其功卽領兵離谷口美不能制乃緣交河西南行二十里俄聞業敗卽麾兵却走業力戰自午至暮至谷口望見無人拊膺大痛再率麾下力戰身被數十創士卒殆盡馬重傷不能進遂被契丹所擒不食三日死遼史業引兵南出朔州三十里至狼牙村惡其名不進左右固請乃行遇耶律斜軫大敗馬重傷不能進匿深林中耶律奚低望見袍影射之墮馬被擒聖宗紀統和四年三

月辛巳順義軍節度使趙希贊以朔州叛附於宋時上與皇太后駐兵馳羅口詔趣東征兵馬以爲應援又稱太后與上自托羅口入南禦宋師敗之

魏志云朔州志石碣谷在朔州南五十里禪房山禪房山今在寧武北二十五里陽方口對岸也狼牙村陳家谷皆不知所在但朔州西南今尚有狼兒村未知是否楊業前勝契丹出西陁蓋卽後言欲避敵鋒之大石路代州志勾注山一名西陁上爲太和嶺後爲白草坪卽廣武舊站通集中去

武二十里但王侁激楊業出雁門北川業指陳家谷口欲其接應必在雁門北川附近去禪房山尚遠恐非今陽方口外之橐蓮臺可望陽方口東北去朔州將六十里遼史稱業兵南出朔州三十里意楊業兵從代往朔非出雁門亦出白草坪或出小蓮花神樹梁最西亦必出盤道梁而後直達大川自在朔州正南必不至陽方口之西南也王侁登橐蓮臺望以爲契丹敗走欲爭其功故緣交河西南行二十里或卽從今朔州馬邑恢河桑乾交

會之處往赴朔州故云西南行若登陽方口之橐
蓮臺望是向東北行矣王侁既不從楊業之計必
又不聽其舍代州紆道寧武或由盤道梁等處始
赴朔州卽業計亦不肯出此業先言出大石路次
應州者乃知契丹已破寰州反由間道東向使契
丹解寰州之兵東追此中乘机應寰朔三州之民
已入碣石谷矣業於應州嚴陳以待而雲州之兵
已到合力敵契丹之兵四州之民便已南遷勁兵
斷後又有伏兵相接計出萬全王侁等既不從其
謀業卽毅然出師揆時度勢必無反出寧武附遼
之事則陽方口河西之橐蓮臺是否王侁望兵處
似應闕疑至遼主與太后駐兵馳邏口趣東征兵
處未知何在其所謂橐蓮臺者或卽托邏口上之
山未可知也

明嘉靖三十四年御史陳豪上言山西諸鎮卒皆爲
寇媒多囊錐刀賂求不殺彼此譯語互爲和同待其
深入然後舉烽發礮蓋不止一日一處爲然且觀此
來之寇類多我民亡命爲彼嚮導故連歲非時猝至

如道故途唯期於必戰盡復套地乃爲全策

總督侍郎翁萬達邊關圖說云謹按所圖形勢起宣
府東路之四海冶迤邐而西歷北中二路抵西路之
西陽河爲大同界東路之東陽河迤邐而西歷北中
二路抵西路之丫角山爲山西界山西之老營堡迤
邐而西歷水泉偏頭抵保德州爲黃河岸界而止計
一千九百二十里有奇皆逼臨敵巢所謂外險也又
老營堡轉南迤邐而東歷寧武雁門抵平刑關又
迤而南而東爲保定界歷龍泉倒馬紫荆之吳王

插箭嶺浮圖峪沿河口又東北爲順天界歷高崖
羊抵居庸而止計二千五百里有奇皆峻山層崗所
謂內險也兩險截然天限中外然自正統以來敵人
窺兵屢恣干擾邇且結陣長驅遠薄汾沁豈其險固
不足恃耶潰廢大防由來者漸有險不設同於無險
因地形而經紀之內倚諸關間增崇垣外築崇垣長
遮絕漠比之金湯邊臣自是始可言守又外邊長圖
說云謹按所圖外邊詳矣而畧於內諸關者以外邊
特重又墻方肇完而諸關不與也三鎮邊墻亘連一

道內布者城堡外環者塹窖亭然者墩巍附穴通者
臺隧增舊爲新缺一不可必如此而後可守

三關中路圖說云明自失東勝漸與敵隣正統己巳
以後時被侵掠因置官設戍犁然具備嘉靖二十一
年設總兵三十九年設兵備道同駐劄於此所屬守
備五州縣三所三本路與雁門岢嵐鼎峙爲三道先
年議守者莫不謂岢嵐僅隔敵一墻一河當急此中
有大同爲外蔽似稍緩不知全晉以大同爲藩籬以
三關爲門戶而寧武爲中路尤三關之砥柱也藩籬
不固則堂奧不安砥柱失守則門戶不固故嘉靖中
大同失守敵知寧武兵單由此入犯太原忻代等處
無寧歲當事因議增大同兵馬每歲防秋時巡撫駐
寧武後復置大將屯重兵居中策應誠謂守大同者
守三晉守寧武者守三關也險隘如盤道之雕窩梁
燕兒水臥羊坡寧武之陽方朔寧王野梁神池之圻
堞礮石板溝靳家窰利民之得勝口牛肋叉灣勒馬
溝八角之長林乾柴野豬溝等處極稱衝要而陽方
直通朔州大川尤爲喫緊故都御史陳講疏云東有

雁門勾注之險西有老營偏頭之塞陜嶺山谷限隔黃河敵人不便大舉獨寧武之陽方口東西長百八十里平行夷漫卽擁十萬衆可成列以進此口實敵人必爭之地三關首犯之衝不止一隅已也敵由水泉紅門入則八角急寧化靜樂等處危援兵宜伏於八柳樹大井溝迎擊之而以老營兵襲其後馬站兵攻其旁由長林野猪溝入則利民急神池等處危援兵宜伏於蔣家峪勒馬溝迎擊之而以老營兵襲其後神池兵攻其旁由莜麥川得勝口入則神池急寧武等處危標兵宜伏於圪堵確大水口迎擊之而以援兵襲其後正兵攻其旁由朔州川陽方口入則盤道朔寧急忻崞等處危標兵宜伏於王野梁臥羊坡迎擊之而以正兵襲其後援兵攻其旁仍於山巔多張烽火旗幟以疑其心隘口設陷坑拒馬以扼其路俾彼入於九敗九陷之地大抵敵騎利平原廣野不利險阻山林本路重崗峻嶺所在天塹彼馬豈易馳驅若不能出奇制勝俾彼東越盤道西過支鍋之口則太原等處將被蹂躪矣彼大舉深入山西必由陽

方口故有警大將軍宜提正兵駐此連合援兵張兩翼以待之東護雁門西策偏老則必可破之故曰守大同者守山西也守中路者守兩關也守陽方口者守全路也

三關西路圖說云偏關故無塞也扼偏關塞自失東勝始蓋偏關去東勝三百餘里登陴眺焉則三受隆城其墟可指永樂間始棄東勝特重偏關故建大將於此其後雲中弛防朔南頻擾陽方失守太原告警於是移總兵於寧武居適中之地然偏關門戶而雁堂奧也堂奧有警而以門戶之守守之是自撤其勾陳而授敵以鑰矣

兩鎮三關志云明初偏頭設鎮將寧雁不能班也及寧鴈設關則但置所亦未與偏頭同以偏頭爲邊鎮例之宣大以寧雁爲腹裏例之倒馬紫荆迨山西以山西爲心而不以夷夏大防爲心於是始視三關爲一而以寧武爲適中地矣夫寧雁之外爲大同偏關之外爲東勝東勝不守是大同之重兵視三關爲一也而乃以寧雁爲適中可乎卽今事併守矣合併守

以爲中亦應在丫角之間而寧武則已南矣

楊博三關兵將疏山西三關先年以有東勝大同爲

之屏蔽邊患絕少自己己之變東勝失守漸肆窺伺

然猶恃有大同未敢深入今三關之警大異往昔正

德十二年則直至陽曲灣今歲則直至交城圪塔頭

若更長驅而入雖平陽潞安俱爲蹂踐之地矣今都

御史陳講御史連鑛覆勘具奏臣等議得神池堡與

老營堡委係必爭之地而八角堡介於其間尤爲適

中雁門守備當十八隘口之險而北樓口委爲空濶

所據各官要於神池老營堡各添設叅將北樓口添

置把總八角堡改置游擊畫地分守勢成鼎足據險

扼塞誠爲長便又要將神池守備改置利民堡三岔

八角俱爲裁革水泉等處設置把總管領屯種要皆

劑量斟酌無不曲當但副總兵旣與巡撫都御史協

同行事威權已重欲加都督職銜似難輕議今俟命

下施行巡撫都御史每年秋近仍駐劄寧武八角以

上仍轄雁門兵備五寨以下仍轄岢嵐兵備庶繫勢

聯絡緩急有濟又照東長峪地方係大同三關兩鎮

寧武府志 卷一
接境之地極爲緊要其連城設兵於兩鎮旣稱有益亦當及早整理

方逢時邊關機宜疏三關俱通寇要區東路自盤道梁夾柳樹燕兒水鷓窩梁等堡進直犯代州太原等處西路自滑石澗黃龍池寺瑪堡水泉營等堡進直犯鎮西與嵐等處中路陽方口王野梁失守少費迂迴可達東路矣此邊形之大較也東中二路外有馬邑朔州烽火相接零騎遽難潛入大舉或數年一至西路

長二百餘里東自水黃墩起西至了角山止一百里尚在朔州川之內自了角山起至老牛灣止一百餘里逼隣沙漠大舉憑陵易逞零騎出沒無常御安賀一桂移鎮之說有見於此計寧武偏關一百八十里正兵營軍馬在三路土著有年勢難他徙其叅遊軍馬果數足勢強大舉雖未能遏絕零騎必可拒堵此移鎮之便也查兩營軍少一千三百三十四名馬少三千四百四十二匹而遽移之是總兵亦叅將等也寇豈憚一總兵官名乎况偏關抵寧縣原平驛二

百餘里東路報警策應恐難猝至此移鎮之未便也
先年俺答乘虛謀陷老營總兵郭琥早得其情由寧
武日暮提兵四鼓卽抵其地而堡賴以全是不移與
移鎮同也今該鎮旣稱軍馬寡弱東路寫遠合無依
其仍駐寧武遇三路但有聲息星馳調度隨賊堵截
明時三關塞塹之制多設于近垣以備侵軼穿地橫
垣曰塹間穿間否形如品字曰塞蓋城堡所以能禦
患者以有塞塹爲恃也然論者謂中國設險有三垣
塹塞垣最可恃塞次之塹又次之垣因高遠眺敵懸
所逃乘險下拒已易爲力塹則沿守者無所依險則
望者不獲遠施計二虜挾一棗徭猶塹塹頃刻之際可
平數丈也若塞有隆伏平乏反難

陽武峪在寧武東南八十里屬崞縣地有楊六郎寨
秦太子扶蘇常軍於此故有太子石宋太宗時都巡
檢使楊延昭驍勇善戰守陽武峪契丹畏之不敵犯
延昭楊業之子也延昭有部將孟良焦贊同守今瓦
崗村有孟良城遺趾尚存其南十里有焦贊寨一明
時寧武所本屬崞縣故陽武峪屬崞縣今亦統於寧武

守備今峪口墩臺地勢上陽武勢充險阨

寧武被圍時總兵周遇吉遣某往某請陽和吳軍門

求救未至而城陷吳入 國朝仍為總制有一旨問

及遇吉之後吳具以其侄對四補神池守備令就近

守其墳墓春秋每祭必來陪祀常以順治初守備舊

劄示知府魏公為言其故如此

寧武令施作楫云周公殉節日期即瀚所作事寔稱

係崇 十六年二月辛巳老明紀類編十七年李白

成破寧武關由大同入京師借號不兩月敗走其年

歲次甲申即 國朝順治元年則所開年分錯誤考

周公墓表大書係崇 十七年二月辛巳查萬年曆

乃二月二十二日也即殮葬日月亦甚分明足以徵

信且訪之遺老數十年前每二月二十二日士民在

祠內致祭後改于九月者因公與劉夫人誕辰在九

月二十日及二十二日也

太原府志載二月十五日賊發太原數日抵寧武

則施作楫二十二日之言不謬矣計其時遇吉守

寧武至城破僅四日耳

王允懋者霸州人以進士仕明爲寧武道當賊將至周總兵欲出戰允懋不從使同知吳某以土實城門比賊破城王亦自殺其妻楊亦投井死而吳亦見殺於賊太原續志以允懋列於節義或過其實然或以允懋欲貳于賊而不與周總兵同心戰守致於城破則又加誣恐允懋不能服也

賊初破寧武亦不甚殺戮旋引兵而東明日賊別部在城中者忽樹藍旗遂肆戕虐被禍者數千人其傷總兵尤世祿所爲也王瑋作節錄補謂賊恨其久不下屠殺一盡血流成波亦失其實蓋但得諸傳聞耳

五寨縣有東西紫寨村稱紫寨長城山上有築鑿處人莫知其自尙嵐州志云州北一里許俗呼其地爲長城梁傳是秦蒙恬築一云趙武靈王築明嘉靖間有村名中圈窰者與長城梁近掘地得石刻其文曰隋開皇元年贊皇縣丁夫築以此按之則五寨長城舊趾當亦隋時所築也

寧武之寧化有臺駘墓有蒯通墓五寨有開平王常

等正府志 卷十一
遇春墓蓋並古墓之失其人不知爲誰氏而里俗因
謬相指目者夫臺駘宣汾洮初不在此卽臺駘塚廟
見于太原西河亦不一矣若常開平北征還卒于柳
河川乃屬此地乎至蒯通已不足信而太原府志亦
載之且爲更名曰蒯文通是尤可笑耳意所謂蒯通
常遇春者大抵唐末及五代金元時人所葬然皆無
可考今蒯墓石羊虎猶存

明萬 中都御史呂坤請令沿邊諸山谷並栽植樹
木仍禁斬伐以禦敵騎之入今郡人尚有稱山中宮
樹者黃花嶺亦有數十株意其昔時所遺也

明時土堡之制相度地宜依山據險而爲之堡中各
積器械矢石官有廨宇士有營舍倉廩草場咸備然
邊方鄉落民堡尤多每虜入守空陴坐視恒遭殺戮
萬 中總督翁萬達令廢民堡之孤懸寡弱者而編
其人于附近大堡每堡擇有才力者爲之長每五十
一名爲一隊每隊奇正各半隊長二人一統其正一
統其奇居常則人守一陴奇正相間一方有急則三
方應援奇者赴之正者攝守又多造火器分給各堡

初虜之攻堡也聲喝諸處而掩其一隅誘之策應而乘其不備鄉民往往擾亂以墮其計至是奇正相參一調一守規畫始密矣

偏關西北二十里山畔有巨石上留足跡一世傳昭君常經此足跡其所履處也遂名其地爲昭君塢
神池有姜女石在縣西三里海子梁方石一片大可盈畝中有石窟傍有女子足痕相傳秦時孟姜女尋夫至此夏日坐哭其上窟中出泉名姜女井

今山海關有姜女祠此復有足跡大抵皆齊東野語耳彼亦未知所謂姜女者之果有是人否也

五寨西北四十里有遮魯城趾一名武王城或云唐末李克用兵駐此扼李鈞矣

神連池昔稱有靈異北魏時秀容第一領人尙長爾朱新興常與其子爾朱榮游於池上忽聞簫鼓之音新興語榮曰古老相傳聞此聲者皆至公輔吾今已衰晚當爲汝耳汝其勉之

黃河唐家會渡在偏關西南九十里明正德十年武宗幸榆林由此渡河明時每冬必遣士卒鑿冰以防

套虜

金時有蕭融者爲武州刺史常于東靈山建立亭臺
今五寨諸山無名東靈者其亭館遺踪更香莫闕矣
寧武樓子山上爲支鐫石山山上巨石一平小者四
爲其足人來遊者以一手撼之則巨石輒動試以數
十人搖之轉不可動父老傳言是臺臨宣汾洮之遺
跡也

偏關城東九龍峯之南一峯別起形家指爲支筆明
天啓闢兵使者耿好仁建塔以增其概高三十三級鈴
鐸之聲聞數十里石額題文筆凌霄四字邑人前後
登科者相率效唐慈恩故事題名於上

神池西北四十里山間有洞勢若天啓戶關山腰莫
能攀躋洞口懸轆轤一可挽以登不知何時所製入
洞中平坦深廣可坐萬人牀几杵竈宛然具在

五寨東南山行數里入空谷中杏花萬樹瀾漫橫斜
隨山形地勢照耀蒸發殊爲異觀

世傳蘆芽山爲毘盧佛道場清澗水出山水側有
佛足跡肉紋宛具云昔佛住世時曾浴此水矣

鐵馳塢偏關地也塢中藏鐵形如臥虎或刻誌其傍
禁人妄掘里俗相傳鐵馳頭出并州太原府鎮鐵樓
下其尾在此而偏關南寺街民家屋內有鐵尖出地
上如尾然雖覆土數尺終莫能掩竟不知其所以然
魏志云山西通志稱隋汾陽宮城六里四十一步寧
化志稱舊城六里二百九十七步煬帝侈靡無度好
大喜夸因起宮而設郡郡兼三縣之地宮名汾陽當
在靜樂界內故隋唐地志靜樂下有汾陽宮有關官
有管涔山天池汾水是今郡城以南皆靜樂地不但
寧化也但寧化之地逼隘阻深似未可起離宮而大
業拾遺記勅于汾陽北四十里臨汾水起宮似在今
寧化以南寧化南至橫水鎮四十里汾水至此始大
而地勢亦稍寬濶安知煬帝建宮不卽此地乎
又云按寧化舊城七里必宋時之重鎮設官屯軍爲
多明時無用故唐勝宗裁其三分之一別築新城也
又云寧化自北魏周隋皆爲重地至宋與遼界金元
迨明漸以無事然皆南屬靜樂自明嘉靖十九年始
屬寧武舉古時之嵐谷天池元池各縣地及蘆芽管

涿林溪汾水諸勝皆歸寧武矣

五寨人張自成其父訓為賈入蜀會吳三桂反訓不得歸竟客死焉後數年三桂平自成尚未知父死往尋之至寧羌州始聞已卒然不能持喪歸遂葬其地地名經畧壩蓋山谷中也一夕石穴忽自合若鬼物助成之者自成衣資為亂兵所掠留落孑然不得已竄身軍伍中然少有勇力敢戰開後起行陣間累功授官至重慶德兵

人既多尚武故往往以武仕顯若程堂郝鍾賢

際中並以守備得蟒衣弓箭之賜尤為異數

劉詔者偏關老營人遠祖在明初官昭武將軍世襲指揮使父光裕當明末失職詔方幼即教以騎射不令讀書詔年二十有相工謂日子狀貌不凡當為將帥雖功名晚就而利在南方詔乃辭其父母去遊江淮間會康熙初征閩詔遂從軍積閱閱至左都督廣東總兵官相者之言驗矣詔以功准四世襲應雲騎尉

樊永底偏關人康熙中為廣東澄海令以道遠家人

不能俱行久之永底方買妾妾至見其容止有異因問所由來妾初不言已而涕泣且告以父官副總兵被劫在繫而逋軍儲無償遂賣已也永底聞之驚慟即日送妾還其家且不責其價人皆傳稱之

偏關西六十里黃河中有石島高十丈餘其上土田五頃可耕有娘娘廟遺址土人相傳云昔漢高祖常惡薄姬而貶焉使潛居于此今呼其處爲娘娘灘黃河東西津渡口也

娘娘灘東二里許爲太子灘渡太子者俗謂漢文帝爲太子時常居此洲往朝薄后今洲中有花紋水一道而其灘淺可徒涉

水經注天池方里餘池中常無斥草及其風澤有淪輒有翠色小鳥投淵出魏志引新訂水經常無斥草作片草風澤有淪作風籟籟字於義爲長若片草則當以斥草爲善蓋池本龍湫有神居之不受物穢故風籟飄淪池上卽有小鳥爲之啼出而人知池之神靈亦不敢以草木投棄其中故曰常無斥草矣道元可爲工于下語者韓吏部南山詩林柯有脫葉欲

墮烏驚救正用其意若作片草便索然少味耳

山西西路管糧太原府同知張爲公舉義士以備表揚事蒙提學道孫批據前任吳同知呈蒙本道批據偏關所闔學生員賀萬壽等呈稱有本所故明廩生賈三光金玉爲質松栢其操遇事敢言皆地方利害之大逢險不避有豪俠慷慨之名因而遭讒幾於不免青雲路絕雖失望於九霄白雪才高尚馳聲於四國山人自樂到處爲家方闖賊攻我寧關適周鎮迎爲山客該鎮亦諒其有家遣役護送贈百金備物之

多本生引爲王臣卻金不納誓九死不移之志及其勢蹙愈見情真周鎮托以後事使賊無汗其家故得一心血戰而死本生能終其前言用火盡焚其室亦赴烈焰骨燼而亡一則有古將斷脰之風可以死而死一則有聖門結纓之志可無死而亦死又有中營游擊王前士生懷忠藎遵義訓於家庭死効堅貞抒壯烈於國士旣隨周鎮而赴難敢分武弁而不揚經該學掌印訓導張五典覆查賈三光素行耿烈蓋世奇行周總鎮聞賊入境差官敦請保其家屬百十餘

口不受賊辱身同赴焰游擊王前士挺身抗賊至死罵不絕口此二人者一爲義士一爲忠臣不讓古人均應表揚以勵風教

五色石斑斕可玩出蘆芽山魏時亮節財疏時有言由西出五色石者明成祖曰兵革災荒小民困苦今何可更以此困苦之官府求一物卽百姓受一害矣正月元旦迎春之禮爛清靜存乎長官之好尚而土俗相沿皆云此禮熱鬧則年穀順成往往試之而有驗禮從其俗可也

初五日民間童女剪紙爲婦人高五六寸許飾以各色清辰掃穢土於箕置紙婦其上棄之門外通衢名曰送窮行路者拾歸置牛牢馬廐間供奉曰送窮媳婦去取富媳婦歸

二十日名小填倉二十五日名大填倉是日煮窩煎餅點燈於倉廩名爲填倉用炭灰布地作大圈名爲挖窖於二十五日祀龍神謂爲龍誕日

二月二日相傳龍擡頭日童稚剃髮清辰自外汲水由大門引灑而進以餘水傾甕內名引龍

偏關六月六日祀崔府君一時男婦羣遊白龍洞名
爲踏青

七月十五日爲中元節拜掃祖塋如清明而加盛
家鍵戶而出者強半婦女往往靚妝豔飾祭畢各擇
山巔水湄綠陰芳逕男女序坐歡讌相望日入而歸
行歌互答貧而無力及墓遠而不能至者或焚楮門
外及大路之傍是日也戚里競作麵蒸美人以爲兒
童之翫間以相餉名暮和樂

十月一日民間呼爲歲臘又號鬼節剪紙爲衣同燒
錢焚墓上天氣已寒惟男子往而婦女不出矣

十二月初八日合雜米豆爲粥間和棗栗諸果寧郡
無異俗也家家鑿冰柱當門而立曰門冰衙外自有
供之者

寧武之俗無論男婦於交運之日竟日閉戶不出禁
止往來卽雞豕猶犬亦皆驅逐不令入戶云是日忌
行冲求吉利

郡中多羊甲于他處居民無分貧富皆衣裘而最貧
者雖暑月亦著之幾如蒙古之俗矣或取其毛製爲

袋囊以運米粟久而難做

土鼠生地穴中清明前穿地食草根人掘土獲之與頗肥美俗名之爲瞎老或持以餽人

郡中亦有牡丹然皆單瓣唯紅色一種其芍藥則豐艷碩麗不減京師至五月乃放

或言金蓮花產五臺此地亦有之然非佳卉初不足觀也

筆頭菜生山谷間苗可食味苦性涼煮之爲茹形似筆頭故俗以爲名

繡茸有曰油瓶瓶者四五片作花如玫瑰色淡而香秋時結細子殷紅珠纍土人云採之秬麥爲餅可食又有名瑤佳佳者八九月吐莢如小雀然

郡西山多柎樹秋時青紅可愛人取其材頗堅中器用字書云柎同櫪卽君櫪樹也古賦君遷子本果實可食今柎樹無子且狀亦微異恐字書之言非也

郡中用錢者每陌輒參以古錢三五多唐至元時者而開元乾元明道熙寧崇寧宣和至正爲尤衆蓋錢文旣貴外來者絕少不得不雜而用之問其俗云行

之已甚久市易租稅咸若是畧勿爲怪或言邊地乏
錢固然要亦其民猶近質耳

郡地至寒而神池之利民尤甚偏關雖突出絕塞然
較利民尚稍和蓋土壤相接而氣候特殊有不可解
者土人云神池每多怪風冬月彌厲故獨冷於他處
風方作時能橫吹牛馬使倒行者或掣之高二二三丈
而墮當夏月時見雲氣忽起卽爲風信不瞬息已至
秋冬間則飄颻無定或十日夜未少休矣

俗當五六月陰晴朝暮往往如江南梅雨時雖地處
北邊而轉多蒸濕或云唯城郭爲然鄉落則否以郡
城環山而地逼故也

	卷之三十一										
--	-------	--	--	--	--	--	--	--	--	--	--

Blank page with a light brown background and faint horizontal lines.

